

## ME FRATI ARVULU

Lu jornu d' 'a me nascita, me patri,  
chiantau 'n campagna un arvulu a signali,  
pi ringraziari, 'nzemmula a me matri,  
la terra pi 'st'eventu eccezionali.

Quann'è chi poi criscivi, mi purtau  
davanti 'dd'arvuliddu nicu nicu,  
a tipu un frati mi lu prisintau:  
la gioia chi pruvavi 'un vi la dicu!

Mi dissi: "L'haju crisciutu comu a tia,  
pirdennuci lu tempu e abbivirallu,  
si voi chi crisci e lu so fruttu lia  
è lu to turnu ora di curallu."

Ed ogni jornu, appena ch'agghiurnava,  
partia cuntenti versu 'stu fratuzzu;  
c' 'u zappuneddu l'erva ci livava,  
ci jittava un catu d'acqua di lu puzzu.


E mi ricordu comu ci parrava,  
cuntannuci li gioi e li tristizzi;  
poi mi zittia, aspittannu chi mi dava  
risposta a tutti quanti li 'ncirtizzi.

E quantu voti poi mi riparau  
di l'acqua di lu celu chi chiuvià;  
cu li so' frutti duci mi saziau  
a l'ùmbra di lu sulì chi cucìa.

Criscennu poi la vita nni spartiu!  
‘Stu frati lu vâ trovu raramenti,  
ma ogni vota quannu chi lu viu  
ricordu ‘ddu passatu, ‘ddi mumentu...

Ma quannu chi haiu la testa chi mi svota  
mi vâ riparu sutta li so’ frunni;  
m’abbrazza, mi proteggi ed ogni vota  
mi staiu ‘n silenziu ed iddu mi rispunni.

*2008*



## LUNTANU

Sugnu assittatu ‘n capu ‘stu pitruni,  
mi godu assulazzatu ‘stu mumentu  
luntanu di li vuci, d’ ‘i pirsuni  
ascutu sulu ‘a vuci di lu ventu.

La menti viaggia ‘n menzu a ‘stu silenziu,  
mi sentu veru parti d’ ‘a natura,  
rispiru l’aria chi mi pari assenziu,  
mi fazzu suspirati d’aria pura.

‘Na fogghia trema ‘n capu la so rama,  
si teni forti ma lu ventu ciuscia,  
eu sentu la so vuci, la so brama,  
arriva chi si stanca e cadi muscia.

E vola araciu araciu chiù luntanu,  
lu ventu nun ci duna mai risettu,  
quann’è chi pari chi cidu la manu  
ritorna arrè e la pigghia pi di pettu.

*2008*

## LI ME' STIDDI

Taliu lu celu e 'un trovu la me stidda  
- mi dissiru n'avemu tuttì una -  
la cercu, ma 'un e' chista e mancu chidda,  
dunn'è la mia si l'havi ogni pirsuna?

Taliu 'stu firmamentu raccamatu,  
la stidda mia chi fa, m'abbannunau?  
Mi calu l'occhi 'n terra scunzulatu:  
la luci chi avia 'n celu s'astutàu!

Ma quannu chi era quasi rassignatu  
'nta la me casa viu du' stiddi veri,  
eu, li me' stiddi l'haiu a lu me latu:  
una è me figghiu e l'otra è me muggheri.

*2007*

## RICORDU

Ricordu chi quann'era nicareddu  
me nonna mi mannava a l'acqua a 'u puzzu,  
eu mi pigghiava 'n manu 'u caticeddu,  
pi cumpagnia ci avia lu me canuzzu.

Partia cuntenti e mi sintia chiù granni  
e mentri caminava jia friscannu;  
nun canuscìa la vita e li so' 'nganni,  
nun canuscìa né scantu e mancu affannu.

E mi raccumannàvanu: "Sta' attentu!  
Ormai si' granni e sai soccu è ch'hâ fari!"  
Avia deci anni, ma 'nta 'ddu mumentu  
eu mi sintia un omu seculari.

Ma ora, quannu tornu a 'dda campagna,  
- lu fazzu qualchi jornu 'nta l'estati -  
la me casuzza sutta la muntagna  
li mura l'havi tutti sdirrubbàti.

Vulissi riturnari arré chiù nicu  
e jiri sempri a l'acqua cu lu catu,  
però mi manca lu canuzzu amicu  
e 'u puzzu è juntu tuttu sdisiccatu.

2008

## RIDI SEMPRI FIGGHIU MEU!

Taliu a me figghiu e tornu nicareddu  
quann'è chi stava sempri spinziratu,  
quann'è chi avìa chiù smannu 'u ciriveddu  
e la tristizza nun m'avìa acchiappatu.

Tu ridi, figghiu meu, chiossai di mia!  
Ci l'hai lu tempu poi di stari afflittu!  
E quannu la tristizza tuppulia  
tu scacciala, 'un ti dari mai scunfittu!

Chi fussi bellu stari picciriddi  
e aviri l'alligria sempri p'amica,  
jucari spinzirati comu ad iddi...

Taliari dintra l'occhi la fatica,  
pigghialla di darré pi li capiddi  
e dirici: "Tu si' la me nimica!"

2008

## A ME MATRI

Comu fazzu a spiegarivi bonu  
‘sta criatura mannata di Diu?  
‘Stu gioiellu, ‘sta gemma, ‘stu donu  
chi mi vosi cu tantu disíu?

L’hannu scrittu püeti e canturi  
di ‘stu tempu e di chiddu passatu  
e p’anzina lu nostru Signuri  
senza d’idda ‘un avissi mai natu.

Eu vulissi truvare palori  
li chiù megghiu, chiù duci, d’effettu  
ma mi zittu, attintannu lu cori,  
mi li detta di dintra lu pettu.

Sti palori, lu cori li sferra,  
ci hannu un granni valuri profunnu  
pi descriviri a ‘st’ancilu ‘n terra  
chi mi fici e mi misi a lu munnu.

Mi piacissi putìrici dari  
tuttu chiddu ch’ha fattu pi mia,  
ma nun pozzu, ‘un si pò ricambiari!  
E ci provu cu chista puisia.

Ed è a idda chi vogghiu mannari  
‘sti me’ versi, chi forsi ‘un su’ nenti,  
ma chi cercanu di ringraziari  
a me matri... ‘sta stidda lucenti.

2008





## ME PATRI

Partìa chi ancòra nun avìa agghiurnatu,  
pi la campagna, dunni travagghiava,  
vinìa ‘nta ‘u lettu e s’era scummigghiàtu  
mi dava un baciù e poi mi cummigghiava.

Eu tra lu dormi e viggia lu sintìa,  
araciu araciu, p’ ‘un m’arruspigghiari,  
a tagghiu di la porta mi dicia:  
“Stasira tornu, tu nun ti scantari”.

La sira, tardu, appena ritornava  
curria cuntenti versu di me patri;  
a lu so coddu, forti m’abbrazzava,  
“Lu tostu ha fattu!” Ci dicia me matri .

Ridennu rispunnìa: “Nun t’azzardari!  
St’attentu, nun si tocca ‘u figghiu meu!  
Tranquillu, ch’ ‘un ti fazzu cafuddari,  
chi ora cca cu tia ci sugnù eu.”

E puru s’era stancu e cu l’affanni  
jucava anticchia ‘nzemmula cu mia:  
“Papa’, quann’è chi crisciu e sugnu granni  
eu vogghiu addivintari comu a tia!”

Me patri, lu me esempiu, lu me faru,  
mi fici lustru e mi mustrau la via;  
tra tutti li gioielli lu chiù raru,  
Diu ‘n celu ed iddu ‘n terra a latu a mia.

## LU PUETA

Lu püeta havi centu, milli occhi  
pi taliari soccu è ch' 'un si vidi;  
centu vucchi e spiruggia 'mpapocchi  
'ncudduriàti, chi nuddu ci cridi.

Pi lu picca tri para d'aricchi  
p'attintari soccu è ch' 'un si dici;  
si lu cerchi, dunn'è chi lu 'ncricchi?  
Circunnatu d'un pugu d'amici!

Lu püeta è un cristianu normali,  
nun è un mostu com'è chi si penza!  
Havi sulu la musa giniali

chi ti scoti lu cori, 'a cuscienza.  
Ma lu fattu, lu chiù eccezionali?  
Senza scola esti 'n'arca di scienza!

2008

## SICILIA RIBELLATI

Sicilia, terra mia t'hâ ribillàri!  
Nun fari finta ch' 'un succedi nenti!  
Eu ti dumannu: " Comu si pò fari  
pirméttiri la morti di 'nnuccenti?

'Na matri li pruteggi a li so' figghi  
e ci àugura li cosi chiù speciali,  
inveci tu li crisci e poi li pigghi,  
li duni 'n pastu a genti criminali.

Sicilia, terra mia, lu voi capiri  
chi su' chiossai li genti chiddi boni?  
Pi 'sti fattazzi nun t'ammutuliri,  
ma parra, senza tanti cunfusioni!

Sicilia, voi capiri chi si forti?!  
Nun fari comu 'u cervu cu lu lupu  
chi scappa, 'un usa li so' corna torti,  
pi fallu capuzziàri nta 'u sdirrupu.

Inveci comu ad iddu vai scappannu  
e mentri vai currennu 'ncontru 'a morti  
ti scanti, nun riagisci e vai vuciannu...  
bastassi picca pi canciari sorti!

2008



*Luigi Oro Sincera*

## ...PERÓ SUGNU ONESTU

A li voti mi mettu a pinzari  
e m'acchiana tanticchia 'u nirvusu;  
ma picchì 'nta 'stu munnu fitusu  
l'omu onestu 'un pò mancu campari?!

Si travagghia p' 'a sula vastedda,  
stannu attentu a li cunti, a li spisi,  
ma purtroppu a la fini d' 'u misi  
c'esti un pani ma menu 'na fedda.

Fazzu nervi e mi strinciu lu mussu  
chì 'na pocu di nullafacenti  
c' 'u suduri, cu chiddu d' 'i denti  
ma com'è chi ti fannu gran lussu?!

Poi mi calmu, arrisettu 'a mirudda,  
penzu a soccu mi dissi me patri:  
“Megghiu onesti chi fari li latri  
e manciari panuzzu e cipudda!”

Mi cunzolu cu chistu pritestu:  
l'onestà la me vera ricchezza!  
Mi ripetu cu 'anticchia di stizza:  
“Sugnu scarsu... però sugnu onestu.”

2008